

नना बेद्रम पिसकन?

1. मता मन्कना पीटो .....	1
2. मन्कना पुटमुळि.....	2
3. मन्कलोर पापमते अरयहूतोर .....	4
4. येसुना पुटमुळि .....	5
5. येसुना हामुरि .....	6
6. देयहूकिन गेल्समुळि .....	9
7. डेहूरेम आयवाल पेकाना पीटो .....	10
8. करब बुदतुन आपुना जीवातगा वाया एमाटु.....	12
9. नयदा पीटो .....	13
10. लाग्वोस गायताल .....	15
11. लाजर इनवाल ओसो साव्कर, वेरा पीटो .....	16
देवुळता बेरा किरिया.....	18

## 1. मता मन्कना पीटो

ए नावाड तमोर-दादालोरिर, एलास्क-बायिस्कनिर, मीक सबेटोरिहूक नावा जोहर.  
नेड नना उंद पीटो वेहतहनन, केंजाटु.

उंद नाटेनगा ओवोंग मतोग, इतेके ओग पोलमता-कबळ कीस पिसिंदोग. उंद वर्सा बार आता, ओना पोलमतगा बेस अनम पुटटा इतेके, ओन्क तना अनम तासलाह लोतग जागा आलो. आलवाहूक, ओग उंद विचर कीतोग. “इद नावा उड्ला लोतुन विहंचि, अद जागातगा बेरा लोन पंडकन. पंडिसि, नावा सबे अनम अगान तासकन” इन्जि विचर कीतोग. अदिहूके ओग पका गिर्दा आसि, पाळना लोतुन विहंचि पूना लोन पंडटोग. पंडिसि, तना पोलमता अनमतुन गाडानाड-गाडाड निहूच ततोग, तचि तना पूना लोतगा निहतोग.



अद लोतगा निंदतद अनमतुन ऊळिसि, ओन्क पका गिर्दा वाता. अद गिर्दातेनाहूकु, ओन्क नगका मुर्तिय उस्कंड वावो आंदु. अदिहूक ओग टेटेम अर्सि, तनाय विचर कींदोग, विचर कीसि, तन-तनाय वळ्हकिंदोग. “हे नावा जीवातिन, नीक इंजेक बेदे पोल्लोतुहूक आल्सुळ इले, वर्सामेंडु उदिस तितेक तेल मारो. अदिहूके निमा तिनु, उनु, बेस गिर्दा-वेळकाते मनु,” इन्जि तन-तनाय वळ्हकिंदोग.

अस्के, तोप्नेन ओन्क उंदि आल्का केंज वाता, “ए उळबे, नीक बुदि इलो रा? नेडे नगका नीवा जीवातुन ओयकन, ओतस्के पया निम बह तिन्ज उन्ज गिर्दा आयकिन? निमा जमा कीतद अनमतुन बेगा बह कीकिन? नियगडाहि पेसिस, नीवा जीवा बेगा दायगा? तान निमा आलिह कीतिना?” इन्जि आल्का केंज वाता.

इद पीटोते बेद्रम ओग मन्कनगा वेल्लाय उळबे मता, ओग अनम-दनमताये सीताते मतोग; मति नना डोलतेके, नावा जीवातुहूकु देवुळतेके दायलाहि अगि बेद्रम दोर्कगा, इदिन ओग बेस्केन

विचर केवोग।

मयगडाहि वने बेचोनो लोकरुल अद्रमे महनल. मति, मन्कल पूरा दुनियातुन गेल्सतेक तेला, तना कुदता जीवातुन लेसिह कीतोऱ इतेके, ओन्क बाताल पाय्दा आयगा? इदिन माटु आलिह कीयना गावले.

मावा जीवा लेसनायो इतेके, माकु देवुळतुन सीता कीस मनदा पोयगा.

मति, देवुळता लोप्पा माक बाताल एर्का मन्हता? सेतेमता देवुळ बेदु, तान माट पुहनला?

इद सीटटुन मीट इंजेके अर्विहनिर, इवटे मीकु देवूळता लोप्पा कगायलाह दोर्कगा.

देवुळ बेद्रमता? इद दुनिया बह पुटटा? मुनेटोऱ मान्वल बोगु? डोलतोर जीवा बेके दास्ता?

इद बूमते बाराहक इचोन अळसन, दुकम, हामुरिहक मन्हताड? नावा पिसमुळ इद बाराहकु?

इद्रमताड गोटिनु मीट बेस्के आलिह कीतिरा?

इव सबे गोटिड कगायलाहि, मीक इद सीटटगा दोर्कनुड.

इद सीटटाड पोल्लोन अर्विस मीट गिर्दा आयकिर.

## 2. मन्कना पुटमुळि

मावा गाय्ता बूमि बेचोन सिंग्रमता!

मीवा नालुड बाजेड ऊळाट. मीकु गेळा-गुंदा, मेटा-गुटा दिसिहूताडा? ...

मरानाड पुंगेहक ऊळाटु, पिटेनाड पाटाड केंजाटु.

अद्रमे नगकाडा वेलाते लेक पगवल, अचोकु उडलाड-बेहराड उकाड मन्हताड, अविस्किन मीट ऊळिहनिर इसि.


इव सबेटविन पुटिह कीतोऱ बोगु?

अद्रमे इळतुहक कनिर एग पेसना, पोऱगोटा मोयुलताहि पेग अरयना, ...ओसो इचुटा पेनेमताहि बेरा मरा आयना, इव सबे बोना कबळ आंदु? इदिन बेस्के मीट आलिह कीतिर बहे.

इद दुनिया बह पुटटा इतेके, सुरुमुने देवुळिये तान पुटिह कीता. दुनिया पुटना वेल्लाय मुनेताहि, देवुळ मता. देवुळि अमेसा मंदे.

देवुळि इद दुनियातुन पुटिह कीयनामुने अगा बातय इलवा मता, वेट ईकळे मंदु.

इद दुनिया बह आसि बह आता इतेके, सुरुमुने देवुळि “वेह्च आयि!” इनजोर इता. इतस्के, अदे कगोते वेह्च आता. इद्रमलेह्का देवुळि, तना तोडटा पोल्लोतेने, इद दुनियाता सबे मादुन इतेके, इदु नेल बूमि,



समदुरता एगु, पोगोटा पोळदु, नेला, उकाड, इळता मरा-गुटा, जाळि-जेबाड, पिटेड-जन्वर्क, इव सबेटविन पुटिह कीता.

इद दुनियाता सबे मादुन पुटिह कीतापया, देवुळि माने-मनकन पुटिह कीता... तानाड गोटिड इंजेक केंजकिर.

देवुळि मुनेटा मान्वन इद्रम पंडटा इतेके, बूमता तोळ्योतुन उचुन तेंडिसि मान्वना सिंग्रम पंडटा. पंडिसि, पया ओग मान्वना लोप्पा, तनाय जीवाता ऊकुरतुन ऊरता.

अह कीसि ओनु जीवा अर्हचीतस्के, ओग जीवाता मान्वल आतोग. अस्के देवुळि ओना पेदिरि 'आदमि' इनजोर तासता. अस्के दुनिया पकाय नेहनल सोबाता मादे निंदतद मता, मति आदमि तोळलेवाह्कु वगोरे मतोग. अदिह्के, देवुळ इता, “वेग आदमि वगोरे मनदनद बेस आयो. नना ओनेनाह्कु तोळ ईयनदिनु पंडिसीकन,” इता. अह इन्जि, देवुळि आदमिह्कु बेह्रा निद्र ईता. ओग निद्रते मतस्के, ओना उंदि मर्डंतुन तेंडिसि, अद मर्डंतगडाहि, उंदि आंचानु पंडटा. आंचान पंडटस्के, आदमि तेदिस ऊळतोग, ऊळिसि गिर्दा आतोग. आदमि तनमुतेनु 'अवालि' इनजोर पेदिर तासतोग, बाराह्क इतेके, अद पूरा दुनियातोर तलोग आयना मता. इद्रमि आदमि-अवालि वेरु, देवुळ पंडटदु असलता दुनियाते, पका गिर्दाते मंदुर. सबे उड्ला-बेरा जन्वर्कु वेरा संगे गोतलेह्का मंदुड, अदिह्के वेरू मुर्तिय रेयलेवा मंदुर..

मति बेस मतोर वेर आळ-इर्वुरिनु, उंदि कोंडा कीता. कीसि, वेरिन बेद्रमतेला बूळे कीकन इता. इदिना लोप्पाडाड गोटिड माट इंजेके ऊळकल.

### 3. मन्कलोर पापमते अरयहतोर

सुरुतस्के आदम-अवालि, वेर मुनेतोर आळ इर्वुर, बातय कसुरलेवा मतोर. पापम-पुनेम ओरिहक तेळियो. लाग्वदिन बेदिने ओर पुनोर आसि. देवुळि ओरिन सोबाता उंदि गेळा-वाळुमतगा तासिस मता. ओरा गिर्दातुहकु ओरगा सबे मताड. ओरा संगे गोटिड कीयलाह, देवुळि दिनमे अगा वासि ओरिन कलियंदु. अस्के देवुळ ओरिन तनाड अडोड कागहता. कागहचि, ओरिन इता, “मीटु नावाड पोल्लोड केंजिस बेस मतेके, नना मियगा अमेसा कलियिस मनदकन, मीट सुकमते मनदकिर. मति नावाड अडोन माळविर इतेके, नयगडाहि वेगुर आयकिर, अद मीक बेस आयो आयगा,” इनजोर इता. अद्रमे मुने ओरु देवुळता संगे मन्जि, गिर्दाते बेस मतोर. वेरिन देवुळ पका जीवा कींदु, वेर वने देवुळतुन जीवा कींदुर.

मनेक-मनेके उंद दिया बार आता इतेके, देयमि आदम-अवानु कोंडा कीता. कीसि, “वेरिन नयेके गुंजकन” इन्जि विचर कीता. अद्रमे कीता वने.

देयमि ओरिन नाळेह कीस, देवुळता विरुद वळ्हकिसि, तनगा गुंजता. अह कीनेके, ओर इर्वुर देयमता जोल-पोल्लोड केंजिसि, ताना पेगके दायलातोर. देवुळ वेरगा बेचोन गूनम तोहता, तान वेर चट्ने माग्डिसि. देवुळता अडोन माग्डिसि, वेर बेह्रा पापम कीतुर. अदिहके पया देवुळ मन्कलोरिन तनगडाहि जेक पंडटा. मन्कलोर देयमता पोल्लो केंजताहकु ओरा जीवाते अमेसा दुकम, तकलिप, रोगम, वाताड. ओर बेस्केन सुकमते मनोर.

आदम-अवाना पापमतेनाहकु, इद दुनियाते हामुर वाता. ताना मुने इतेके, हामुरता पेदिर वने इलो आसि. देवुळ ओरिन इता, “मीक नना बूमता तोळ्योताहि पंडटन, अहे मीट हातस्के, मीवा मेंदुलि मल्स तोळ्योतगाने मिंजगा,” इनजोर इता.

मन्कलोरा मेंदुल कोनि तोळ्योताहि पंडटद मन्हता, अदिहके अदु कळियिस दास्ता. मति ओरा जीवा इतेके, देवुळताये ऊकुर आंदु, इलेया? अदिहके मावा जीवा बेस्केन डोलो. मावा जीवा बेस मतेके, आक्रिते देवुळतेके दास्ता, इलवेके देयमदीपतेके लेसिहता.

आदम-अवाना पापमतेनाहकु इद बूमतुहक वेल्लाय पीळा अरता, अर्सि, इद बूमते कोयेड, अकल-रोंडाड इद्रमताड पुटटाड. अदिहके, लोकुरा पिसमुळतुहकु ओरिहक वेल्ला कहटेम कीया पोयंदु. इद्रमलेहका आसि, मन्कलोरा देवुळता नडुम विरुद आता. अचोने आयो मति मन्कना, जन्वर्कना नडुम वने विरुद आता. अद्रमे मन्कलोरा नडुम वने विरुद आता. आसनेहकु, सबे लागवाड कबस्क पुटटाड, इतेके जग्ळा-बोबा, ओदे-कले, कूदि-जोलि, हळकना-कोहकना, इव सबे पुटटाड.

अचोन आतेक तेला देवुळि तना पुटिह कीता मन्कलोरिन माग्ड पगवो. मति, ओरा जीवातुन

पिसिह कीयलाह ऊळिंदु. देयमतुन आरे कीसि लोकरिन पिसिह केवान ओर्विन लोहतकन इन्जि, देवुळ किरिया ईता. ओग पिसिह केवाल वासि देयमतगडाहि, पापमतगडाहि, हामुरतगडाहि वने लोकरिन पिसिह कीयनोग. अस्के कोनि लोकरा देवुळतगा कलियमुळ आयगा. लोकर देवुळता अद किरियातुन आसा कीस मतोर. मन्जि, पिसिह केवाल बेस्के पुटनोग इन्जि, पीळिनाड-पीळिड, पीळिनाड-पीळिड, अग ऊळसोर मतोर.

ओग पिसिह केवाल बोग आंदोग इतेके, देवुळताये मगि येसु.  
येसु इद दुनियाते बह पुट वातोग, ताना लोप्पा इंजेके गय्क मन्जि अर्वकिर.

## 4. येसुना पुटमुळि

इद दुनियाता लोकरिन पिसिह केवाल बह पुटटोग, अद पोल्लो इंजेक माट ऊळकल.

लोकरिन, देयहकना कय इळताहि पिसिह कीयलाह, देवुळि तनमगिन इद बूमते लोहता. ओगु इद बूमते वायनामुने, देवुळबाबाना संगे देवुळदीपते मतोग. बेस्के देवुळ इद दुनियातुन पंडटा, अस्के तन मगाना संगेने, अद सबे कबळ मारिह कीता. दुनिया पंडिस मारतस्के वेल्लाय पयाने, ओग देवुळता मगि, मान्वल आसि इद बूमते पुट वातोग. अद पोल्लो नना मीक वेहतहनन, सीताते तासाटु.

उंद मरियाल पेदिरता लेया पिला मता. तानु, ओर्वोग योसेप पेदिरतोग पेकाहकु, ताल्हकिस कर्सा ईस मतोर. ओराड मर्मिना मुनेने, देवुळि तना देवतुलतुन, अद मरियाल लेयातुन ताना पोल्लो वेहतलाह लोहता. देवतुल मरियानगा वातस्के, तान ऊळिसि अद पका रेयिस मता.

अस्के देवतुल इता, “पेडि, नाक ऊळिसि निमा रेयमा, नना देवुळता कबुरतोनने. निमा बेरा देयवाता पिलातिन. अदिहके इद देवुळता बेसता कबुर नीक वेहतहनन. देवुळिये मान्वल आसि, नीवा पोटाते पुटनोग. ओना पेदिर येसु मनदग. ओगे लोकरिन तमा पापमताहि पिसिह केवाल आयनोग,” इन्जि देवतुल इता. अस्के मरियाल इता, “अह इतेके, देवुळता बेद विचर मन्हूता, अहे आयि”, इन्जि इता. अद्रमे पया, अद नेलाड हक्कतद दिसता.


अस्के तान ताल्हकतोग कोय्तोग, योसेपि, तान नना विळिससीकन इन्जि विचर कीतोग. वेग इद्रम आलिह कीनेके, ऊळाटु, देवुळता देवतुलि कलाते वासि ओन वेहता: “हे योसेपि, मरियाना पोटाते बेद पेनेम मन्हूता, अदु मन्कना आयो मति, देवुळता पवित्र जीवातेनाहिये मन्हूता. अदिहके निमा तान

ततलाह पेगके-मुनेह आयमा,” इन्जि ओन बेस वेहता. देवतुलताड इव पोल्लोड केंजिसि, योसेपि मरियाना संगे मर्मिड कीतोग. मति येसु पुटनाहजोम, ओग तान कय बोयोग.

पया बह आता इतेके, वेर सिरगंचि कीयलाहि बेत्लेहेम नाटे अतोर. अगा अतस्के, ताना रिक्म आयना वेला एवता. मति, अगा ओरिहक बेगान जागा दोर्को, दोर्कवाहकु बोनायो कौंदा कोळकातगा अद रिक्म आता. अद तना पेकानु पाळना मुर्वेते ऊर्हचि, पीरतगा तासिस मता.

अदे नगका, बोरो गोरे कोपालोर, अद नाटेना एरे तमाड गोरेना मंदा वाटिसि मतोर. अस्के, उंदिय देबा, बंक्ने उंद देवतुल ओरा मुनेह वास निता. नितस्के, ओरा सर्ने पूरा वेहच आता, आताहकु वेर रेयिसि साडतोर. अस्के देवतुल ओरिन इता, “मीट रेयमाटु. मति मीक उंद गिर्दाता पोल्लो नना वेहता वातन, अदिन केंजाटु. नेंडु, इद दुनियातुन पिसिह केवाल, देवुळता पेकाल पुटटोग. ओन मीटु बेत्लेहेम नाटे अन्जि, उंद कौंदा कोळकातगा मुर्वेते ऊर्हचि पीरतगा तासतदिन ऊळकिर,” इता. इन्जि देवतुल, देवुळदीपतगा मल्स दायनदिन वेर ऊळतोर.

पया वेर गिर्दातुहकु, तमाड गोरेन अगान विळिसिसि, बेत्लेहेम नाटे, ओन पेकान ऊळलाह विततोर. वितिसि ऊळनेके, उंद कोळकातगा, अस्केन पुटटोग पेकाल, मुर्वेते ऊर्हचि पीरतगा तासिस मतद दिसता. ओन पेकान ऊळिसि, देवतुल वेहता पोल्लोतुन, वेर नमतोर. नमताहकु, अद पोल्लोतुन ओरु सबेटोर लोकुरिन वेहतलाह आतोर. अद पोल्लोतुन सिरगंचितेनाहक बेत्लेहेम नाटे जमा आस मतोर लोकुर, पका बामिसि वळ्हकिदुर.



## 5. येसुना हामुरि

देवुळता मगि येसु, इद दुनियाते बह पुट वातोग, ताना लोप्पा मीट अर्वतिर.

येसु बेस्के बारा वयसतोग मतोग, अस्के तना लोतोर संगे, उंद बेरा पोल्लवातुहकु, येरुसलेम सहरते अन्ज मतोग. पोल्ला मारिस, तमा नाग मल्स अनेके, ओग पेकाल लेसतोग इन्जि, ओना लोतोरिहक एर्का आता. एर्का आतस्के, ओर कंद्रेम आसि ओन पर्हकलाह बोटदुर. पर्हकसोर-



पहूकसोर ओर येरुसलेम सहर एवनाह अतोर. मूंड दियाड पहूकतोर मति, ओग पेकाल दोर्कोग. पया ऊळतेके, ओगु देवुळता मंदिरतगा उदिस मन्जि, बेरोर-बेरोरा संगे, देवुळताड गोटिड वळहकलाह आस मतोग.

अस्के ओना तलोसि ओनु तेर्हता, “पूरा सहरमेंडु इके-अके पहूकलाह आतोम इतेके, निमा पेकानिन इगा वास उदतिन. नीक इगा बाताल कबळ मन्हता?” इता. अस्के येसु तलिन इतोग, “अवा, नना नावा बाबाना कबळतेनाहकु इद भूमते वातन इन्जि, मीक एर्का इले. एर्का मन्ज मतेके, मीट नाक इद्रम पहूकविर आवेरिर,” इनजोर इतोग. नना देवुळता मगनन इन्जि, ओन्कु उड्लगडासि एर्काय मंदु.

पया येसु बेरोग आतोग अस्के, ओग सबे नाहक-नाहक अन्जि, देवुळताड पोल्लोड लोकुरिन कागहचोरे तिरियिंदोग. ओग कय इटटेके, गुडिर ऊळिंदुर, कूटालोर ताकिंदुर, मूकालोर वळहकिंदुर, एवडालोर वेंदुर.

ओना उंद पोल्लोतेने, बोर-बोरिन देयहक पोस मताड, अव वने वितिंदुड. ओसो, डोलतोर लेयोरिन इंका तेरिह कींदोग. ईताड कबस्किन उळिसि, वेल्लाटोर लोकुर ओना संगे मन्जि पेगके-पेगके अंदुर, ओरु येसुनाड पोल्लोड गिदाते केंजिदुर.

ओनग, वेल्लाटोर लोकुर जमा आयनदिन ऊळिसि, पेर्मालोरिहक पका ओड वांदु. अदिहक ओर येसुन इंदुर, “निमा बोनेनाह ईताड कबस्क कीयहनिन? नीक बाताल अदिकर मन्हता, लोकुरा पापमतुन मापि कीयलाह?” इनजोरे ओन कटूला कींदुर. अस्के येसु इतोग, “नना देवुळता मगनन, नावा बाबानाय लावते ईताड कबस्क कीयहन्न” इन्जि ओरिन वेहतोग. मति ओरु येसुसामिना पोल्लोतुन मुर्तिय सेतेम पोयोर. ओना पोल्लोतुन नमवा, ओन उक-ऊके कटूला कींदुरे.



येसुना विरुदतोर ओन हक्कनुर इन्जि, येसुहक एर्काय मता. अदिहक येसु तनाड कागयवलोरिन, “नावा विरुदतोर नाक पोस हक्कनुर. मति, मूंड दियाने ओसो जीवा अर्सि तेरककन” इन्जि वेहन्दोग. अद्रमे पया आता वने. ओन पोसनेहक राजालोरेके ओसि, उगसिन ओना पोगोन तप तोहतोर. अस्के लोकुर ओन उस्कतोर-पास्कतोर. राजानाड सीपयक ओन पका देबाड ईतोर, ईसि बेरा गलति कीतोनेलेहका हक्कनद सिक्सा ईतोर.

हक्कनागुटातगा ओनाड कय्किन-काल्किन मोलाड कोहकिसि वेळहतोर.

पका तिपलते ओना जीवा पेसता.

येसुना पवित्र नेतुरि, दुनियातोर पापमतेनाहक इद बूमते पोवतस्के ओना कबळ मारता. तना कबळ मारता इन्जि, ओग हायनामुने, “देवुळबाबा, वेरा पापमतुन मापि कीम” इनजोरे देवुळतुन मोळकसोरेन डोलतोग.

ओग डोलिसाय मति, रेंडे दियाड गुमयातग मतोग. पया मूंड दियाने हामुरतगडाहि तेरकतोग. बह इतेके, हामुरि सामिना जीवातुन आरे कीया पगवो. ओग तेरकतस्के पया, बेचोनो लोकुर ओन ऊळतोर, ओना संगे तितोर-उटोर.

रेंड वीसाड दियाना पया, ओग सबेटोरिहक दिसनाहे, मोयुलते तेदिस देवुळदीपतगा मल्स अतोग.

ए नावाड दादालोरिर, अकास्कनिर, इद ऊळाटु,

माट बोरे देवुळतुन ऊळवल,  
बोरे ताना आल्कातुन केंजवल.

मति, देवुळता मगि इद बूमते पुट वाताहकु, देवुळता पोल्लो माक दोर्कता. इव पोल्लोड माट पवित्र सास्त्रमते अर्विहूनल. अद सास्त्रम बार इन्हता इतेके, येसु मावा पापम-दुकमतेनाहकु मोक अरतोग. मोक अर्सि, मावा पापमता कर्सा निहतोग. मति इद पोल्लो, मावा लोकुर इंका मुर्तिय पुनोर. पुनवाहकु, वेर इंजेक वने मोकिड ईस्तोर. मति येसुसामिनाय नेतुरतेन, देवुळि मावा सबेटोरा पोगोन गूनम आस्ता, इतेके माक इंजेक बेदे मोक ईयना गर्ज इले. येसुसामिना मोकि दुनियामेटोरिहक अमेसा अमेसातुहक आयगा.

मीट इद पोल्लोतुन सेतेम पोसि, येसुसामिनगा वाटु.

वातिर इतेके, येसुना देय्वाते मीवा पापम, रोगम, दुकम, रेयि, इव सबे मियगडाहि जेक आयनुड. येसु मीवा जीवातुहक गिर्दा, सुकम ईयनोग.

नेंड इद पोल्लोतुन केंजिसि, मीट बोर-बोर इद्रम आलिह कीकिर इतेके: “येसुसामिन नना मोळकना इतेके, बाताल-बाताल तान्क ईया पोयगायो, बह-बह कीस माक नोम पोयतगायो” इनदकिर. मति, इदिन केंजाटु, येसुसामिन मोळकलाहि मीक बातले ईया पोयो. मात्रम देवुळता पोगोन मीट मीवा जीवाताहि जीवा कीयना, ओसो देवुळि पवित्र मन्हता इनजोरे, मीट सबे पापमतगडाहि जेक मनदना,

अचोने.

इद बेचोटा बेसतल पोल्लो!

## 6. देयहकिन गेल्समुळि

उंद नाटे, ओर्वोगा वेल्लाडे देयहक पोयतोग मतोग।


ओग मुने बेसे मतोग, मति, देयहक पोयतस्के ओगु पियल-पोळदु कूळल आसि तिरियिंदोग। नाटेनग मनवा, गुमयानगान मंदोग। अगा मन्जि, नरका पिळिवळ ऊकाड वाटिंदोग। तना मेंदुदुन तनाये बंडाने कोहकिस

नोमुर्क कींदोग। नाटेनोर ओनु, गोल्सिने दोहच ऊळिंदुर, मति, अव गोल्सिनु ओग पिडोह-पोडोह देहचि पोहंदोग। अदिहक ओन बोरे आव्रे कीया पगवोर। ओग मन्कल इचोन आकाड-दोकानोग मतोग इतेके, ओग मनदनद अगदे बोगे बह दाय़ा पगवोग आंदोग।

इद्रम मनेके, येसुसामि उंद दिया, देवुळताड पोल्लोड वेहचोर- वेहचोर, अद नाग एवतोग। येसुसामिन जेकताहे ऊळिसि, ओग देयहक पोयतोगु सामिना मुनेह वासि कालगडेम अरतोग, अस्के ओन पोयताड देयहकु इताड, “अलो! निमा बाराहक इगा वातिन? माक बह सिक्सा ईयलाह वातिना? निमा देवुळता मगनिन इन्जि माट पुहनोम”, इन्जि इताड।

अस्के येसु “वेनगडाह पेसिस अन्हट!” इनजोर ओन पोयताड देयहकिन पूंडटोग, अस्के ओना उंद पोल्लोतेन, अव पेसिस वितताड. अस्के ओग मन्कल बेस आसि, बेस बुदते वळहकलाह आतोग, तान ऊळिसि नाटेनोर बामतोर.

अद्रमे दुसा उंद मल्का बार आता, ओर्वोगा उड्लोग पेकाल मतोग, ओग पेकान देयम पोस मता. अदिहके ओगु पेकाल वळहकवा, वेनवा मतोग। ओग ऊक-ऊके कुळिन्दल लेहका आसि, बेस्के किसतगा, बेस्के एतगा इद्रम बेगा इतेक अगा अरन्दोग। ओग पेकाना तपे येसुसामिनगा ओन ततस्के, येसु ओन पोयतद देयमतुन वेरहचि इद्रम इतोग, “ए देयमतिन, पेकानगडाह पेसिस विता, बेस्केन मल्स वामा निमा!” इद्रम देयमतुन दगाड ईतोग. ईतस्के अद देयमि वितता.



अह आनेके ओग पेकाल नेल अर्सि,

डोलतप लेहका आस मतोग। येसु ओना कय पोसि ओन तेहतोग, अस्के ऊळाट, पेकाल पूरा सत्रेम आतोग। आसि ओग वळ्हक पगन्दोग, वेनदा पगन्दोग।

येसुसामि उंद मल्का इद्रम इतोग, “देयम इतेके सिरप कललाह, हळकलाह, बूळे कीयलाह, इदे विचरमते वास्ता. मति नना मीक बेसतल जीवा ईयलाह वातन, इतोग। इद पोल्लो निटमे!

मीक इतेके एर्काय मन्हता, बोग मन्कन देयम पोयतहता, ओना जीवातुन तिनदलाहे अद ऊळिहता. मति, येसुसामि तना कुदता जीवातुन मयेनाहक ईता, ईसि मावा जीवातुन देयमतगडाहि पिसिह कीयलाह ऊळिहता.

देयम पोयतोरिन इर्विरिन बेद्रम येसु विळिसह कीतोग, अदिन मीट अर्वतिर. वेर इर्वुरे आयो, मति देयम पोयतोर बोर-बोर येसुनग वातोर, ओर कतमतोरें बेस आंदुर.

येसुना मुनेह निता पगवाहकु, देयहकु कतमे रेयिस वितिंदुड.

येसु देयमतुन पूंडलाह बाताले केवोग, मति ओना उंदिय पोल्लोतेन वितिंदुड.

इद पोल्लोतुन केंजिसि, येसुनगा बेचोन बेरा लाव मन्हता, इदिना विचर कीम्हटु. अदिहकु येसु मीवा तोळ मतेके, मीक देयमता बातय रेय इले. रेयलेवा मीक पिसना इतेके, “येसुसामि, नावा जीवाते वायु, नावा लोते वायु इनजोर, मीट केयाटु, ओना पेदिर पोस केयकिर अस्के, ओग मीवा केयनदिन केंजिसि, मीवा तोळ आयनोग.

## 7. डेहरेम आयवाल पेकाना पीटो

उंद नाटे, ओर्वोग मन्कल मतोग। ओन्क इर्वुर पेकोर मतोर।

ओर इर्वुर मगिरगडाहि, बेरोन्क उचुन बुद मता, मति उडलोन्क मुर्तिय बुद इलो आसि.

ओग उडलोग मगि, उंद दिया तपेनगा वासि, इह इतोग, “बाबा, निमा मुय्तोग आस डोलनाहजोम, नना बेलाह केपकन? मावा लोते, नावा तूसता बेचोन मालसोम मन्हता, अदिन नाक तूसिस ईम! नावा तूस नाक इंजेकेन गावले!” इन्जि इतोग.

अद्रम इतस्के, ओरा तपे अद ओना तूसता मालसोमतुन, ओन्क तूसिस ईतोग. अस्के ओग पेकाल, तना तूसता मालसोमतुन वमिसि, अव कोताड पोसि, वेल्लाय जेक दुसा देसेम अतोग. अगा

अतस्के ओनग वेल्लाड कोताड मताड. अदिन ऊळिसि, ओन्क अगा वेल्लाटोर गोततोर दोर्कतोर. ओरा संगे ओग, कबळ-काम लेवा, वेलियसोर मन्जि तनग मतद कतम कोतानु, पूराय मारिह कीतोऱा. ओनाड कोताड कतम मारतस्के, ओना गोततोर वने ओन विळिससि विततोर.

अद तूकने अद देसेमते बेरा उंद दुकळ अरता, अरतस्के, ओनगा कोताड इलवाहूकु, नना इंजेके बह कीस पिसकन इन्जि, ओग आलिह कीया बोटटोग. अद्रम विचर कीसि, अद देसेमतगा बोगो मता मान्वनगा अन्जि, “नना नियगा ओर्युलाय मनदकन, सायब”, इन्जि ताल्हूकतोऱा. ताल्हूकिसि ओनगाने ओर्युल मन्जि पदिड मेहंदोग..

मति, अद लोते ओग पेकाहूक बेस्केन तिनदलाह बराबर गाटो एवोर. अद्रम कऱिव्हूक मन्ज- मन्जि, ओग पेकाल उंद दिया, पदिड तिनदनद पोलेतुनाय तिन्जि, नना पोटा निहेनन इन्जि, विचर कीतोऱा, अह कीनेके ओन्क तना लोता सीता वाता. “नावा बाबाना लोते बेचोनो ओर्युलतोर बेस पोटामेंड तिन्जि सुकमते मन्हूतोर, मति नना इगा कऱिव्हूक डोलिहनन” इन्जि, आलिह कीसि अळतोऱा.

अस्के “नना इगा मनोन आयकन , बाबानेकेन दाकन. अन्जि इद्रम इनदकन, बाबा, नना बेरा गलित कीतन, मावा लोता मालसोमतुन बूळे कीतन इतेके, नीवा मगि इनदलाह इंजेक ओप्पोन. मति इद लोता ओर्युलाय मनदकन” ” इनजोर, अगडाहि लोन मल्स दायलाह पेसतोऱा.

ओग पेकाना तपे बारा, नावा मग बेस्के वायनोग इन्जि, अमेसा अग ऊळिंदोग.

पया ओग पेकाल तना लोन मल्स वानेके, तपेहूक जेकतगडाह दिसतोऱा. अस्के तपे , “नावा पेकाल वातोऱा रो!” इन्जि केयसोरेन, ओग पेकानगा एवनाह विततोग. वितिसि, तना मगिन गळम



ओऱडतोऱा. अस्के ओग पेकाल अळसोरेने, “नीवा मगि इनदलाह वने नना ओप्पोन, बाबा”, इद्रम इनदलाह आतोऱा. मति, तपे “निमा अळमा, लोन दय” इनजोर ओतोऱा. ओसि, तना ओर्युलतोरिन केयिस, ओर्विन इतोऱा, “निमा पेकाहूकु एग मीयलाहि एग तचीम.” ओसो दुसोन इतोऱा. “निमा दूकनतगा अन्ज, पूनाड आडिड, एल्पुस्क पोस वाय” इतोऱा. ओसो दुसोरिन इतोऱा, “मीट रा रेंड-मूंड बेसताड एरेंड हव्काटु, नुलपे

नाटेनोरिहूक कुळिप ईकन”, इन्जि इतोऱा. “नावा पेकाल लेसिस मतोग मति मल्स वातोऱा” इन्जि, ओगु इद्रमलेहूका गिर्दा कीतोऱा.

ओग लेसिस मतोग पेकानलेह्काने माट वने लेसिस मह्नल.

बेद देवुळ माक पुटिह कीता, तान माट पुनवल,  
मति, बंडा-गुटातुन इदे देवुळि इदे सामि इनजोर इहनल.

माट लेसताह्के, देवुळि मन्कल आसि इद बूमते वातोग, ओगे येसुसामि आंदोग.

दुनियाता लोकरिन देवुळतगा वाट इनजोर, केयलाह वातोग.

माट देवुळतगा अतेके, अद माक बेस्केन, नयग वामाट इन्जि इनो. मति नावाड पिलाड-  
पेकोरिर, मरक-मयस्कनिर इन्जि, जीवा कीयगा. देवुळता गूनम बेचोटा बेरा आंदु, इदिन मीट  
पुनदकिर...

अस्के मीवा जीवातुह्क सितुर आयगा .

## 8. करब बुदतुन आपुना जीवातगा वाया एमाटु.

इंजेक ओसो इद उंद पीटो अर्वकिर. अद आंदु लोळडालता.

उंद लोळडाल मता. अद अमेसा नाटेनगा नेडिसि वेल्लाडे एरेंड-गोरेनु तिंदु. पया नाटेनोर बेद्रम  
कीतोर इतेके, इंजेके मावा नाटेनाड एरेंड-गोरेड मायलाह आताड, अदिह्क इद लोळडालतुन दोर्किह  
कीस हक्कतेक बेस आयगा इन्जि, विचर कीतोर. कीसि, उंद दिया अद लोळडाल वातदिन ऊळीसि,  
तान पूडलाह आतोर. मति, अद लोळडाल ओरिह्काय वेल्लाय मुनेह वितलाह आता. वितनेक-वितनेके,  
बोनायो पोलमतगा एवता. अगा ओर्वोग मुय्तो मन्कल कबळ कीसोर मतोग. ओनग वासि अद  
लोळडाल इता, “ए मुय्तो दादा, नाक वेर नाटेनोर हक्कलाह पर्ह्किहतोर, मति नाक निमा मुर्बत कीसि,  
गय्क मकिह कीस तासतेके, बेस्केन नीक माडगोन आयकन. नीक बेदाय उंद कबळतुह्क अरयकन”  
इन्जि इता. अस्के ओग मुय्तोग वने, बेदे विचर केवालेवा इंगो इतोग, इन्जि, अद लोळडालतुन बेदो  
बोंदातगा मक वेहतोग, वेहचि, ताना पोगोनू पीर वाटिसि मुचिसीतोग.

अस्के नाटेनोर लोकर ओनग वासि “इके लोळडाल वित वातदिन बह ऊळविन रा?” इन्जि  
तालह्कतोर. मति ओग मुय्तोग ओरिन “नना ऊळोन रा” इतोग, अस्के ओर मल्स अतोर. अस्के

लोळडाल ओन मुय्तोन “नाटेनोर अतोर?” इन्जि ताल्हूकहता. ओग मुय्तोग इतोग, “ओर एरेन मन्हूतोर, गय्क मन” इतोग। नाटेनोर वेल्लाय जेक अतस्के पया, अद लोळडाल पितो-पोतो तेदिसि, ओग मुय्तोग मान्वन हक्किस तिता.

दादालोरिर अकास्कनिर, इद पीटो माक सबेटोरेनाहूक आंदु.

बेचोक मल्काड इद्रम आस्ता, माटु मावा पापमतुनु, लागवा पोल्लोन, मावा जीवातगा मकिह कीस तासलाह ऊळिहनल. माटु देवुळ माक ऊळो इन्जि, विचर कीयहनल. मति, देवुळि अद नाटेनोरा लेहूका आयो. अद इतेके सबे ऊळिहूता, सबे पुन्हता. मावा लोप्पा बाताल-बाताल आस्ता, अदिन माक मकिह कीयलाह बेदे अग इले. मति उंदिय अग मन्हूता, अद बेद्रमता इतेके, देवुळता मुनेह मावा पापमतुन कबुल आयना.

पापम बेद इतेके, देवुळता सेतेमतुन केव पायवालेवा मन्जि, जोल पोल्लोड, उळबे, चिक्टम, ओदेड, कलेड, ओडु, जगळा, नाळेह कीयना, इद्रमताडे पापम आंदुड.

इद दुनियाते पापम केवोग, बोगे इलेग. अदिनेनाहूकु, नयगा बेदे पापम इले इन्जि, माट बोरे इनदा पगवल. पापमतुन मकिह कीकल इतेके, अद माकु लोळडालता लेहूका मयगा मकिस मन्जि, मावा जीवातुन तिनदगा.

अदिनेनाहूकु, पापमतुन पोहचि, येसुसामिन मीट विस्वस कीम्हूटु. कीतेके, ओग मीक मापि कीयनोग. मापि कीसि, मीक देवुळता मगनन, मयानन इनदलाह अदिकर ईयनोग.

मीट वेल्ला आल्सेम केमाटु, नेडे देवुळतुन मापि ताल्हूकाटु. नाळ बाताल आयगा, अदिन बोगे पुनोग.

## 9. नयदा पीटो

माट सबेटोरल नेंड उंदि नयदा पीटो अर्वकल.

उंद देबा बार आता इतेके, उंद नयु, कऱव वसताहूकु, गेळा वेलियलाह अता. अस्के तान्कु डोडाताड मीन्कना गब दलगता, अदिहूक अद मीन्किन पर्हूकलाह, डोडातेके दायनदु अगदे दाकन इता. अह इनेके, तान्कु दुसा वने अविना गब दलगता. अव अविना गब मेटातेनाह वाता. अदिहूकु अद नय

डोडातेके दायनद अगदुन विळिससि, मेटाता अगदे दायलाह आता. अनेके अद नय अविनगा एववाय मता, अस्के तोप्नेन मुनेताड मीन्कना सीता वाता. अदिहक अद मल्स डोडाता अगदे दायलाह आता, अनेके ओसोवेन तोप्नेन अविना सीता वाता. अद्रमे रेंड-मूंड देबाड, इके ओसो, अके ओसो, वितिस ऊळता. वितता मति, तान्क बेदे अग पट अरवो, बाराहक इतेके, अद नयदुहकु, रेंडिनास, उंदिय-देबा तिनदना विचर मता. पया आक्रिते, अद उंद आयडा कीता, कीसि, नडुम गेळा-टुटतुहक वितलाह आसि. अद्रम वितनेके, बेदो गुटा अद नयदा पोटातुन पगक पहता. अस्के अद नयदा पोटाताड पोर्हक पेसिसि, अद अगान कुस्के डोलता.

अद्रमलेहकाने, मन्कलोर वने रेंड विचर्कने मन्हूतोर. बह इतेके, मन्कल ताकनाड रेंड अगिड मन्हूताड इन्जि, येसुसामि माक काऱहतहूतोऱ. उंद अगि इतेके, किसबूमतेके ओयनदु, ओसो उंद अग बार देवुळदीपतगा ओयनदु. किसबूमतगा ओस ईयनद बेद इतेके, पापमि. देवुळता सेतेमतुन केव पायवालेवा मन्जि, जोल पौल्लोड, उळबे, चिळ्टम, ओदेड, कलेड, ओडु, जग्ळा, नाळेह कीयना, इद्रमताड पापम आंदुड.

बोर मन्कलोरु पापमता अगदुन पोस ताकिहूतोर, ओरा जीवा आक्रिते बूळेम आयगा. बूळेम आसि आक्रिते ओरु देयहकना किसबूमते अरयनुर. मति, देवुळि पापि लोकरिन जीवा कीस्ता. अदिहके, बोनाय जीवा बूळेम आयना आयो इन्जि, देवुळता विचर मन्हूता. देवुळि, लोकरा पोगोन इचोन जीवा कीता इतेके, तना ओर्वोंगे मगिनु, येसुनु, लोकरा पापमतेनाहकु हायलाह लोहता. येसु दुनियातोर कतमतोरा पापमता सिक्सातुन, तना पोगोन एचि, हक्कनागुटातगा डोलतोऱ. अदिहके येसु इन्हूतोऱ “अगि, सेतेम, जीवा ननाये आंदन,” इन्हूतोऱ.

अदिनेनाहकु, ए नावा दादालोरि अकास्कनिर, मीट नितमे सेतेमता अगदुन पुनदना इतेके, येसुसामिनगा वाटुः वासि, मीवा सबे पापमतेनाहक मापि ताल्हकाटु, अस्के ओगु मीवा पापमतुन मापि कीसि, मीक बेसतल अगदे ताकलाहि तोळ आयनोऱ. अद अगि मीकु अमेसाता पिसमुळता देवुळदीपते ओस ईयगा.

मति बारायो, मियग्डाहि बोऱाय अद नयदा लेहका, उंदिय देबा रेंड अगिने आसा कीसि ताकलाहि ऊळिहूतोऱ? मीट पापमतुन वने जीवा कीयलाह ऊळिहूनिरे, ओसो अमेसाता पिसमुळतुन वने दोर्किह कीयलाह ऊळिहूनिरे, इद्रम बह आया पऱायहूता? अव रेंडिनग्डाहि बेदाय उंदतुन मीट आचाटु, किसबूमता हामुरतुन, इलवेक देवुळदीपता पिसमुळतुन. बह मीट नेंडु मीवा पापमतुन येसुसामिना मुनेह कबुल कीयलाह ऊळविरा? कबुल कीतिर इतेके, येसुसामि मीवा पापमतुन मापि कीसि, मीवा जीवातगा गिर्दा ईयगा.



## 10. लागवोग गायताल

मावा नाटे ओवोग गायताल मन्हूतोग, ओग इचोन लागवोगु इतेके, ओनेनाहूक माट सबेटोरल वेल्लाय तिपलते म्हनल. मावा नाटेनगा वेल्लाटोरिन, तना ओर्युल तासिसि, ओरिन पकाये कबळ वेहतहूतोग.

ओग बोग आंदोग इतेके, कलु.

कलु, मावा समाजता लोकरिनु, तना कय इळन तासता. बोर-बोर ताना सीताते मन्हूतोर, ओरिनु  
लागवाड-लागवाड कबस्क कीसि तिर्हतहूता.

कल-रिमाते अरतोरु, तमा लोतोरिन मुर्तिय सीता केवोर. ओराड पिलाड-पेकोर कग्विहूक डोलिहूतोर, ओरिहूक केगयलाहि बेसताड गेंडेड वेन दोर्कोड. कल उनवाल मन्कल बेचोन कमय कीतेकाय कडेन जीरिह कीस्तोग. इद्रमतोर सिरपि रिमातुने पर्हूकिहूतोग. रिमा आतस्के, लोतोगा संगे पकाय जगळा कीस्तोर. ओरा लोते बेस्केन सुकम इले. बोर-बोर इतेके, तमा कुदता लोकरिन इंका, पेगके-मुनेह सीता केवालेवा हक्किहूतोर. अद्रमे कल उन्ज-उन्जि बेचोनो लोकरु तमा जीवातुन पोहतोर. इद इतेके मीक एर्काय मन्हूता.

मीवा नडुम वेन कल उनवलोरिर बेचुरिर म्हनिर! बोराय मीकु कल उनमाटु इनजोर वेहतेके, मीट बार इहूनिर? “किरिया रा, नना नेटाहि उनोन” इन्जि इहूनिर. मति मीट पया विळस पगविर. गळिकहूक विळसकिराय मति, ओसो वेन ताना मीक सीता वायगा. बेस्के मीवा लोते बेदाय तिपल वायगा, जगळम आयगा, बेमर वायगा, बेदाय मीवा लोता नुस्कन आयगा, अस्के ओसोवने, अद कडुन सीता कीस, पर्हूककिर. इद्रमलेहका मीट कडुन विळसकोम इतेकाय, विळस पगविर.  
अद्रमतोरिने कडा कय इळन मनवालोर इन्हूतोर.

ए नावाड दादालोरिर, अकास्कनिर, इद नावा पोल्लोतुन बेस केंजाटु. बोर-बोरु इद्रम कल रिमातुन अमेसा पर्हूकवालोरिर, मियेनाहूकु उंदि बेसता कबुर मन्हूता. तान केंजकिर.

कल रिमा इतेके, देयमता उंद आयडा आंदु. देयम बेद्रमता, अद पोल्लो मीक एर्काय मन्हूता. अद लोकरिन हक्कना, बूळे कीयना, इनजोरिने अग ऊळिहूता.

मति, येसुसामि अद्रम आयो. ओग माक बेसतल बुद ईसि, बेस मनदलाह कागहतह्तोग. ओगु देयमताड सबे कबस्किन बूळे कीसि, माकु पिसिह कीयना इनजोरे, इद बूमते पुट वास मतोग. ओना लोप्पा मीट केंजतिर. ओने मीट इद्रम ताल्हकाटु:



“येसुसामि, इद कल उनडना

अल्वटटाहि नाक पिसिह कीमु”, इनजोर इन्हटु.

येसु कडुन मागडलाहि मीक तोळ आयनोग. अद्रमे, मीट बोर-बोरिर करा, गुटका, नसु, पोगा, इविना कय इळन म्हनिर. ओसो बोर-बोर मीवा उळबेतेनाहक, कोग-आटुमता गुलाम आस म्हनिर. अगा अन्जि, ओळ पासि, उगसिने कोताड वने पोहतह्निर. बेस्के-बेस्के जगळमास देबाड वेन तिह्निर. अचोन अह आतेकाय, अगा दायनदिन विळसविर. अद्रमतोरिने गुलामि इन्हतोर.

इद्रमताड गुलामताहि पिसना इतेके, मीट येसुसामिनेके ऊळाटु. ऊळिसि, ओना सायता ताल्हकाटु. अस्के ओग मीवा लाग्वा अल्वटटुनु मियगडाहि जेक कीयनोग. कीसि, मीवा बुदतुन बदले कीयनोग. अस्के मीवा जीवा बदलेम आयगा. पया मीटु, बेदे लाग्वा कबळते, गुलाम आस मनविर आयकिर.

मति, इह केंजाटु, वेटानोर बेद्रम वदिड ओय्हकिस पितेन अर्हतहतोर, अद्रमे देयमि, ओसोवने लाग्वा अल्वटटे, मीक एग्हिह कीसि अर्हतलाह ऊळगा. मति, येसुसामिनगा मीट बेस गोत मतेके, ओनाये लावते, देयमता वदतुन पेरक-परक कीसि वित पगयकिर. इद उंद बेचोटा बेसता कबुरि!

## 11. लाजर इनवाल ओसो साव्कर, वेरा पीटो

उंद देबा येसु, देवुळदीप, देयमदीपता लोप्पा इद्रम कागहतोग:

ओर्वोग बेरोग साव्कर मतोग. ओग अमेसा बेसताड गेंदेड, बंगर, वेंडिड केगन्दोग. ओग दिनमे बेस-बेसताड पुलाने गाटो तिंदोग. ओना लोता मुनेह अगदगान, ओर्वोग स तिनवाल गरिब मान्वल मतोग. ओना पेदिर लाजर मता. ओग ताक पगवाहकु, बोरो, ओनु, साव्करना लोता मुनेह

तचि तासिस मतोर.

ओन्क इद्रमता बेमर मता इतेके, ओना मेंदुदगा पूरा बोटाड आस मताड, अव बोटाड विरियिस कळियतप आस मतोग. ओनाड नोमुर्किन नयक वास नाकिंदुड. ओग मन्कल अचोन तिपलते मतोग मति, ओग मता मान्वहूकु ओना पोगोन इचुनाय मान वसो.

ओग लाजर, साव्कर मन्कना मेजातगा, पोवताड पेसावार्किनु तिन्ज तेला पोटा निहेनन इन्जि विचर कींदोग, मति ओन्क बेस्केन दोर्को.

पया मनेक-मनेके इह आता इतेके, ओग लाजर डोलतोग. अस्के देवतुल्क वासि, ओन देवुळदीपतगा ओसीताड.



पया मनेके, ओग साव्कर मन्कल वने डोलतोग. मति ओना जीवा, देयहूकना किसबूमतगा अता.

अगा मन्जि तिपल आनेके, ओगु पोगोन ऊळतोग, ऊळतस्के वेल्लाय जेक देवुळदीपते लाजर ओन्क बेरा गिर्दति मनदनद दिसतोग. अगा ओगु देवुळता मन्कल अब्रहमना संगे उदिस मतद ओन्क दिसता. अस्के ओगु किसबूमताहि अळसोरेन अब्रहमिन केयिस इतोग, “ए दादा, नाक मुर्बत कीसि, लाजरना

कयदे इचुन एग लोहचीम, नना इद किसतगा मन्जि वेयिहूनन” इनजोर केयतोग.

अस्के अब्रहम इतोग, “इद्रम आया पगवो तमो. देवुळदीपताहि देयमदीपतगा वायलाह अग इले. इगडाहि अगा, अगडाहि इगा बोरे वाया पुनोर” इनजोर इतोग.

नीक सीता मन्हूताया? बूमते मनेके, निमा बेस सुकमते मतिन, अस्के लाजर नीवा लोता मुनेह मन्जि बेचोनो तिपलते मतोग! इंजेके ओगु इगा सुकमते मन्हूतोग, निमा दुकमते महूनिन.”

अस्के ओग मन्कल अळसोर इतोग, “अह इतेके, लाजरिन मावा नाटे लोहचीम. अगा नावाड एयवुर तमोर मन्हूतोर, ओर इगा वामाकिर. ओर तेला पिसिर,” इनजोर इतोग.

मति अब्रहम ओन इतोग, “देवुळताड पोल्लोड काःहवालोर अगा मन्हूतोर, अव पोल्लोन ओर केंजिर,” इन्जि इतोग.

अस्के ओग मन्कल इतोग, “आयो दादा, डोलतोरगडाहि बोगाय अतेके, अद्रमतोनाय केंजिस नमनुर” इन्जि इतोग.

मति अब्रहम इतोग, “इंजेक ओरिहक केंजलाह दोर्किहताड, अवे देवुळताड पोल्लोड ओर केंजिर. अविन केंजोर इतेके, हातोरगडाहि बोगाय अन्ज वेहतेक वने, ओनाड केंजोर आयनुर” इनजोर अब्रहम इतोग.

## देवुळता बेरा किरिया

देवुळ सेतेमता आंदु. अद तना किरिया कीस वेहतव पोल्लोन बेस्केन माण्डो, बेस्केन मिळहो. अदिहके देवुळता उंद उंद पोल्लो करल आस्ता.

इद ऊळाट, मुने आदम अवानु, ओर्वोग देयमतुन आरे केवाल, लोकरिन पिसिह केवान लोहतकन इन्जि देवुळि करल कीस मता. अहे, बेस्के देवुळ-पेकाल येसु, इद दुनियाते पुट वातोग, अस्के अद पोल्लो करल आता.

ओसो ऊळाटु, येसु जीवात मनेके, “नना डोलतेकाय हामुरताहि तेककन” इनजोरे वेहच मतोग,  
अहे लोकर ओन हक्कतस्के, गुमयातगा मूंड दियाड मन्जि, ओसो जीवा अर्सि तेकतोग वने. तेकतस्के पया, ओग तनाड कगायवालोरे वेल्लाटोरिहक कलियतोग. कलियिसि रेंड वीसाड दियाड ओरा संगे मतोग. मन्जि तेना पया, वेल्लाय लोकर ऊळनस्केन, ओगु मोयुल पोगोन तेदिस, देवुळदीपते अतोग.

येसु बह मोयुलतगा तेदिस अतोग, अहे ओसो मल्स वायनोग इनजोरे, देवुळि किरिया कीस वेहतद मन्हता. इद पोल्लो पवित्र सास्त्रमते रास्तद मन्हता. नांगा वेहतपु, पवित्र सास्त्रमते बेव बेव पोल्लोड किरिया कीस वेहच मता, अव सबे करल आताड. अवटे माट पुहूनल, येसु ओसो इद दुनियाते मल्स वायनोग, इन्जि इद किरियावने, निटम करल आयागा.

इदिन केंजाटु, रेंड हजरिहक वर्साड मुने येसु इद बूमते पुट वानेके ओग, ओर्वोग उड्लोग

पेकाल आसि पुट वातोऱ। मति इंजेक ओसो मल्स वानेके, ओग बाला पेकानलेहूका वावोऱ आयनोऱ, मति, देवुळदीपता राजानलेहूका, पका बेरा डीसाते वायनोऱ। बह इतेके, येसु राजाल मोयुल पोऱोन उदिसि, बेचोको कोटिड-कोटिड देवतुल्कना अकुहूकना आळोते, वेल्ला कदरते वायनोऱ।

ओगु अद्रम वायनदिन दुनियामेटोर कतमतोर ऊळनुर।

अद वेलाते दुनियातोर सबेटोर पुनदनुर, ओगे सेतेम देवुळि आंदोऱ इनजोरे।

दुनियाताड सबे कुलमतोर, उइलोर-बेहरोरिहूक, ओना मुनेह कप-मुळिन्दस मोळक पोयतगा।

अस्के कोनि इद बूम मारना वेला आयगा।

अद तूकने, बोर-बोर येसुना पोल्लोतुन विस्वस तासिस मनदनुर, ओरिन ओऱ तना संगे अमेसातुहूक मनदलाह देवुळदीपते ओयनोऱ।

मति, पिसतोर सबेटोर लोकर, देयहूकना संगे मळगना किस बूमतगा पकाय सिक्साते, अमेसा अळसोर मंदनुर। देवुळता सास्त्रमते अहे रास्तद मन्हूता।

येसुसामि तपवालेवा ओसो मल्स वायनोऱ।

ओऱ नेंडवन-नाळवन वाया पऱायहूतोऱ, अदिहूक मीटु ओना अऱ ऊळसोर मन्हूटु।

विस्वसि लोकरिहूकु अद उंदि बेचोन गिर्दाता दिया मंदगा!

मति येसुन नमवोरिहूक मात्रम, अद दिया वेल्लाये रेय वसनद दिया आयगा।